

Tutu Nì Tiaa San Pablo nùu Filemón

¹Yùhù nduí Pablo. Te vichi ndiadí vehecàa sàhà-ñá nchícuìn Jesucristu. Te ñani-ndà Timoteo, yohó iá stná-nè xí. Te cásàhú-nsì xì mii-ní Filemón, vàchi iin-ni quidá stná-ní chuun xi Jesús (nahi nsiùhù). Te màni cuáhà-ní nùu-nsí. ²Te cásàhú stná-nsì xì doña Apia, vàchi màni stná-nè nùu-nsí na iin cùha-nda. Daaní, cásàhú stná-nsì xì Arquipo, vàchi iin-ni nchícùn stná-te capitán ndiaha xí-nda. Stná nsidaa ana natácá cahvi xi Dios vehe-nsia, cásàhú stná-nsì xì-né. ³(Pues vichi xícàn tàhvì-nsí nùu) Yua-nda Dios xì Stoho-ndà Jesucristu ñà-nì cùnì màni-yá nsidaa-nsiá, te contentu ni cúndóó-nsiá quida-ya.

Ñà-ndúá nì xicàn Pablo nùu Filemón

⁴Yùhù naquímánì mii-yá sàhà mii-ní na cada xícàn tàhvì nùu-yá sàhà-ní, ⁵vàchi sàni xinitnùhi ñà-cuàhà guá cuú inì-ní sàhà nsidaa nèhivì xì Dios, te xiníndísà vaha stná-ní Stoho-ndà Jesús. ⁶Ñàyùcàndùá, xícàn tàhvì nùu Dios ñà-nì sàà-ní mànihì inì-ní ñà-cuàhà guá ñà-vaha ndiaha sàni nihitáhvi-ndà nùu Jesucristu, vàchi nú ducán cundaà vaha ini-ndà,

dandu vètùni quida stná-ndà cuàhà obra, te ñà-jaàn nduá ndiá icà-ndà quida-nda nú sàni xinidisa-nda mii-yá. ⁷Cunaha-ní, cuàhà gá cudfì inì ñà-cùu guá inì-ní sàhà nèhivì xí Dios. Ndiaha gá sàni ndòo inì vichi, vàchi tùha-ní nacuàhandee inì-ní nèhivì xí-yá. ⁸Ñàyùcàndùá, sàhà-ñá nchícùn stná-ní Cristu, mà úhì dandacuí nùu-ní quida-ní favor sàhà iin chuun cuú ofrecer. ⁹Doco còo, mà quidé ducán; chicá vaha cuacundahví nùu-ní, vàchi ináhì cuàhà gá cuú stnahá ini-ndà sàhà-ndà. Te cunì nsinuu stná inì-ní ñà-ndùf iin nècuàchì chicá sàni sahnu cuahà, te ndiadí stná ñà-lé`ladu xi Jesucristu. ¹⁰Ñàyùcàndùá sacúndáhvi` nùu-ní ñà-nacuaca-ní Onésimo, vàchi na iin dèhi nduú-né. Ndiadí vahi yohó, doco sàhà yùhù sàni nihì stná-nè nì xinindisá-né mii-yá. ¹¹Cunaha-ní, mate antes cónì quidá víi-né na ní sa-ia-ne nùu-ní, doco vichi vètùni quida viì-né chuun vaha nùu-ní, xì stná nùu yùhù. ¹²Te vichi cuàhìn techuín-nè nasaa-nè ndé iá-ní. Ñàyùcàndùá, quidamanì-ní nacuaca-nínè, vàchi màni cuáhà-né nú. ¹³Cachì-ní, vàchi nisa nihnu inì ndòo-ne xí`

yohó ñà-coo-ne cuenta xi mii-ní, te cunucuachi-né nùí na ié` vehecàa yohó sàhà-ñá chicá cuitià razón ndiaha xí-yá. ¹⁴Doco còó, chicá vaha màsà ndóo-ne yohó nú tãñáha ga cachi mii-ní, vachi có-cùnì` cundua fuerza quida-ní favor mà. Còó, ñà-ndùá cudîi ini mii-ní ni cúndúá, cunî. ¹⁵Mate iin ùi quivì ni quee-ne nùè-ní, doco quida-ní cuenta na ian ducán (nì quida Dios) sàhà ñà-vàtùni nàcòo tu-ne xì-ní nicanicuahàn. ¹⁶Doco vichi, mà cúndúú gá-nè peón nì xiin-ní, còó. Nahi ñani-ní cunduu-ne, te chicá ndiaá iin ñani-ndà nùè iin peón. Màni cuàhà-né nùí, doco chicá más icúmí-nê coo manì-né nùè mii-ní, vachi cuàhàn-nè coo-ne xì-ní vehe-ní, cutnahá stná-nè xì-ní cahvi-nsiá Stoho-ndà Señor.

¹⁷Ñàyùcàndùá, nú nihnú stná inì-ní ñà-iin-ni xínduu-nda compañeru (nùè Dios), dandu quida stná-ní xì nècuàchì jaàn na ian quidà-ní xì yùhù. ¹⁸Te nú iá iin cuàchì nì quida-ne nùè-ní, ò nú iá ñà-ndùá iníhíca-nê, dandu nùè yùhù quida-niá cobrar. ¹⁹Yùhù nduí Pablo, te icúmí danái-ñà. Cunaha-ní, ndahà yùhù tiaí palabra yohó. Doco sà-ináhá-ní, cuàhà gá iníhíca stná

mii-ní nùè yùhù, te có-xiñùhù dansínúú inì mii-ní ñà-sàhà yùhù nì nanihítàhvì-ní vida xi-ní. ²⁰Ñáni, sacúndáhvì` nùè-ní, quidamani-ní xì ñà-jaàn, vachi iin-ni nchícùn-ndà Stoho-ndà Señor. Quida-ní favor sàhà-ñá ni coí contentu, vachi (ináhá-nî) iin-ni xiníndísá-ndá mii-yá.

²¹Pues yùhù, cundéé inì mii-ní ñà-cunini-ní yùhù; te ináhí icúmí-ní quida-ní ñà-ndùá cachí`; ndè más gá icúmí-ní quida-ní, ñàyùcàndùá, tiaí carta yohó nùè-ní.

²²Daaní, cuní stnài ni coó tùha iin vehe tii ñà-coi ndé iá-nî, vachi icúmí esperanza ñà-chindee Dios yùhù, vachi divi ñà-jaàn nduá xícàn tàhvì-nsiá nùè-yá sàhí. Ñàyùcàndùá, nihnú inì sài ndé ndoó-nsiá.

²³Yohó iá stná Epafras, ndiadí stná-nè sàhà-ñá nchícùn-nè Jesucristu. Te cásàhú stná-nè xì mii-ní, ²⁴te cásàhú gá stná dava ga compañerùí xì-ní, divi Marcos, xì Aristarco, xì Demas, xì Lucas; vachi xínduu stná-ne ana chindéé xí sàhà chuun (xi Dios). ²⁵Pues vichi ni níhítàhvì cuàhà-nsiá gracia xi Stoho-ndà Jesucristu ini anima-nsiá. Sà-íá.